

puerum, patris omniumque necessariorum consilio & ope destitutum, extorrem, inopem, egenum, tam indigno exilio paterni imperii finibus ejectum, mendicare paterentur. Polliceri ad hæc, magnum auri pondus, præmia & multa & magna proponere, quæ, recepto imperio, se bona fide præstiturum affirmabat. Moverunt pueri lachrymæ, movit & ipsa ætas, omnium qui aderant animos, visaque est omnibus digna causa, cui quisque libens favere vellet. Accedebant ad hæc ampla pueri pollicita, quæ in tanto discrimine proponenda ab iis, qui ejus fugæ erant comites, edoctum eum credibile est. Nam vix ea quæ dixi, ætas vel longe maturior, non modo illa quæ primos annos nondum erat egressa, per se tam facile commenta esset. Pollicitus dicitur, si solus aut cum patre in imperium restitutus esset, Constantinopolitanam Ecclesiam Romanæ subicere: certumque auri pondus se Venetis Gallisque pro cladibus, quas olim Emanuel Imperator utrisque diverso tempore intulisset, daturum: & cum his aliam grandem Venetis pecuniam, quam ab initio cum externis ducibus pro copiarum trajectione pacti fuissent. His conditionibus ad prima veris signa Veneti Gallique ex Dalmatia moverunt, perpetuo cursu Constantinopolim, si per ventos liceret, petaturi. Jaderenses interea profugi, audito Veneti discessu, infestissimam Histris finitimisque Dalmatiæ populis piraticam exercere cœperunt. Adversus eos nova classis decreta: præerat vicario nomine Reipublicæ Rainerius Dandulus, Henrici filius, juvenis impiger. Hoc auctore aliquot naves adversus Jaderenses exules instructæ, in Dalmatiam transivere: præsidium insulæ, quæ Jaderæ proxima adjacet, ad hostium conatus opprimendos est impositum: *Malo consilio*, ferunt loco nomen inditum. Munitionem ipsam extorres Pannoniæ, Regis opibus freti, subito incursum, præsidio repente oppresso, diruerunt. Quamobrem longe major navium numerus decretus, qui omnino satis ad temerarios motus consiliaque hostium evertenda crederetur. Quem, quum studio parari hostes rescivissent, pacem suppliciter petitam his legibus impetrarunt, ut principum liberis Venetias missis, in patriam exules

1202

1203
*Veneti Gal-
 lique in gra-
 tiam Alexii
 pueri in
 Graciam
 movent.*